

Un proyecto cu a exige 2 dia di reunion largo y intensivo

Minister Visser ta contento cu acuerdo firma pa Aruba haya un hospital nobo y renoba esun actual

ORANJESTAD (AAN): Den apenas 3 aña di gobernacion, Minister di Salud Publico y Deporte, dr. Richard Visser, ta logra otro proyecto mas pa e pueblo di Aruba den e parti medico, cu ta primordial pa cualkier pais. Parlamento a vota na fabor di renobacion y expansion di Dr Horacio Oduber Hospitaal.

Na aña 1972 a construi nos hospital actual, tempo cu Aruba tabata conta cu un poblacion di mas o menos 50 mil hende y tabatin un promedio di 200 mil turista pa aña ta bishita Aruba. Actualmente esaki sigur no ta e caso mas, ya cu Aruba ta conta cu un poblacion di mas o menos 105 mil hende y tin como 1.6 miyon turista ta frecuente nos isla. Pues e necesidad pa tin un hospital mas amplio, brindando miho calidad di cuida medico como tambe cu mas capacidad, ta un prioridad. Despues di 2 dia largo y intensivo di reunion den Parlamento, Gobierno di Aruba a haya autorisacion pa firma e acuerdo di huurovereenkomst cu SOGA, pa haci un construccion di dos parti di hospital y renobacion di esun existente. Henter gobierno a keda hopi contento cu a haya aprobacion di casi 80% di esunnan presente den sala di Parlamento; ya cu 14 di 18 voto, tabata pro.


SOGA ta conoci caba pa financia proyectonan grandi, di cua e gobierno anterior mes a haci uzo di nan pa realisa algun proyecto. "Esaki ta un dia hopi grandi pa henter nos comunidad, ya cu Aruba ta bay haya su hospital nobo. Nos a haya un mapa for di un grupo Hulandes cu sigur no tabata loke nos a spera. E mapa cu nan a presenta no tabata manera nos a premira nos hospital nobo y. sigur p'e tempo actual cu nos ta bibando aden y pa garantisa cu e hospital por bay 25 aña of mas. Varios punto relaciona cu infra-

estructura no tabata cuadra cu e realidad y sigur pa tin 3 tipo di fundeshi, dak y muraya, ta haci'e hopi mas caro. P'esey mesora a dicidi pa busca otro arkitekto pa pinta algo cu realmente por ta adecuado pa nos, algo cu ta yuda nos cu e vision cu nos tin", e mandatario a remarca.

E dignatario a splica tambe cu lo traha e hospital nobo, riba e mesun tereno unda esun actual ta ubica. E motivo di esaki ta cu e companianan di utilidad tin diferente liña cu ta drenta hospital y esaki ta costa demasiado placa pa hac'ie na un otro luga. E costo di e infraestructura aki ta core entre 30-45 miyon p'e trabaonan bou di tera si mester traha esaki dinobo na un otro localidad. E hospital actual ta riba nos famoso 'tourist corridor', na momento di un fayó di electricidad, hospital hunto cu area turistico ta haya coriente prome. Tambe no por kita afo, cu varios especialista ya a ubica nan clinica rond di hospital actual y tur esaki ta djis pa ta mas accesibel y facil pa e pashentnan en cuestion.

E otro punto cu e dignatario a amplia riba dje ta, cu a haci varios estudio di tereno eynan, manera si e tera ta fuerte of no pa cualkier problema di naturalesa y tur cos a sali positivo. Tambe por haci uzo di e skelet di e hospital actual, ta djis mester reeinfors'e.

"E concepto di e hospital nobo, lo ta uno completamente diferente y sigur a tene cuenta cu e sugerencianan di e expertonan, como tambe esunnan cu ta traha diariamente eyden. E edificio no lo tin e estructura bieu rectangular, pero mas bien e lo haya forma di un race-track, unda cu e parti di enfermeria lo keda central. Di e forma aki e enfermeronan no mester cana hopi leu pa sea busca nan aparatonan, informacion, y of remedi ya



cu tur cos ta bay ta central. Nos a sinta cu e nursenan y stakeholders pa papia di e nan necesidadnan, mirando cu nan t'esunnan cu ta haci 80% di tur e trabao den hospital. Despues di e intercambio di idea aki, e arkitectonan mester a haci un analisis y nos a dicidi di inverti 7 miyon mas, pa haci e cambionan cu a sali for di enfermeronan."

Un aspecto hopi importante cu e mandatario a pone enfasis riba dje, ta esun di medio ambiente. El a indica cu e medio ambiente lo ta ful nobo, unda cu na momento cu bo drenta e hospital, ya bo ta haya e sentimiento cu bo ta bay bira miho. Tur aspecto di diseño, flur, textura, asta e pañanan y e colonan di tela ta diferente y ta aporta pa trece un ambiente mas positivo pa tanto e pashent como e bishitan-

tenan. "Nos a enfoca completamente riba e pashent, como tambe con pa elimina contaminacion y infeccion, p'esey nos a dicidi pa bin cu 2 liña di trafico pa e liftman pa evita cu e bishitantenan ta topa cu esunnan cu ta labora den hospital. Esaki ta djis un ehempel pa indica cu e edificio mes lo ta bay ta mas saludabel. Tambe nos a concentra masha hopi mes riba e wachtkamer, tanto den sala di emergencia, como tambe ora di warda un pashent. Nos a crea luga pa papia cu bo dokter mas priva, luga pa warda un persona cu ta haciendo test na hospital, unda cu bo por sinta y relaha y no ta sinta den un gang. Pues no solamente nos a enfoca riba e pashentnan, pero tambe e famianan lo haya un experiencia completamente nobo ora di drenta nos hospital.

Intencion ta pa nos haya e "Gold Lead Certificate" cu sigur ta algo cu lo eleva e status di nos hospital internacionalmente. Nos a echt enfoca pa tur cos ta centralisa. Otro punto di atencion tabata e entradanan di diferente seccion di e hospital, di cua cada entrada lo ta mas priva y separa. Ta bay tin un entrada apart pa ambulance, wachtkamer manera mester ta den e seccion di emergencia, aumento di dokternan cu ta bay traha eyden, tambe 25 nurse specialisa. Sin laga afo un MOB, unda tur especialista ta bay tin nan mesun edificio conecta cu hospital, cu entrada separa pa no congestiona hospital."

No tin duda cu Aruba ta ansioso pa mira esaki den practica, pasobra ta yega ora pa realmente nos cuminsa inverti y mehora nos instituto principal di cuida medico, teniendo na cuenta e futuro generacion y cu ta trah'e a base di un vision riba largo plaso, pues 25 aña of mas. Minister Visser ta gradici tur su coleganan pa nan sosten y e pueblo di Aruba, ya cu despues di poco mas cu 40 aña, Aruba lo haya un hospital nobo, cu ta completamente ekipa pa brinda e miho cuida medico y cu e poblacion merece..